

Angig Mo Pita Ginofena

Hwa buk enaig esog

Hwa bukba sihigba emba Kristen elim kwaganigim afa ehengelni olug onigigim wasneihianugi sa kinig kwania kahlig. Afa enaig sihifeg, Kristen el sa ma pese onigi Sisas Krais na suialag mom. Enag mo eba enaig sihifeg. Sisas lahagim afa pese buhiagim afa ehe hwaig sihifeg fwahag, ehe pese blofe. Ehengel sa ma fwina onigiaflifi sa ehe heafna mo sihi fwahag enam ningiaflafim ehe pese blofe. Eba nufunam enag Kristen el kinig kahlig, eba Kristen na olug onigigim yuhnag og, sa ma olug oniginam wasnei afofiba sa ma ikagna Krais pese bloi. Afa enanam ehengel suialag augu flife.

1 ¹Afa ka Pita Sisas Kraisna kanog fwahag el. Afa nengel Ju el Sisasim olug onigig na ka nem hwa mo faig. Afa el nem fegonigibgi asa ne nimbeafna kembigim fwahigim mingnag kembig gam ikaminefeg. Afa glau nengel provins Pontus afa Galesia afa Kapadosia afa Esia afa Bitinia enanai yi gohka.

²Afa autunam God Api nengelim wefug fwatig sa ne Sisas Kraisna mo patalfuiba asa heafna tafna nem gigiafeni. Afa Godna Sungwabug sa ma nem esenibi asa ne afsug el fi. Afa ka membeg sa ma God nem fwina esug kwaganig i afa olug enesieg i fai.

Suialag nofekagag bigim heven la nengen go

³Asa big God eba Ainiyag Sisas Kraisna alagim suialag oni. Afa ehe bigim kwania aflafenigim asa Sisas Kraisim ningihiagim afa ehe pese biteg kife nai ilao fatig. Afa enaba God bigim mulugnofkenagag faig. Afa big ati anwenafig Godna mo sihi fwahag eba ehe nufunam eseфе.

⁴Afa suialag gawig God bigim ona fai asa big enam glau nengeafo. Afa God enam heven la faka fwahag afa enanai yiba eba mas nogi afa amtakwale afa awaie.

⁵Afa nengel Sisasim olug onigibgi asa God heafna wasneigni nem kikagfo lambfiego afa sumi yi osuna ehe nem ambala pese lambiba asa ne suialag augufefe.

⁶Afa enam ne onigigim asa ne sifakalig. Afa glauba mwakwalig ne haig haig kinig yi susug flig.

⁷Afa enag kinig nengelni olug onigigim yuhni fi nufunam me awai awai me. Afa el golim suwi la tuhlfugba og sa ma nufunam gol pugui. Afa enag golba mas wahkig gofi. Afa nengelni olug onigig golim gosenag afa kinig nengelni olug onigigim yuhningba asa ma enaba olug onigig wahkig gofufe. Afa maia enanam Sisas Krais ambala puguiba afa sa ehe nem sifakalenim nengelni unehlagim fangi fenfi. ⁸Afa nengel ehem mas nangug mo afa ne ehe nai yi fwina onigig lugwafba afa glau nengel ehem nangu fwainig fig afa ne ehem olug oniginigim asa ne sifakalig. Afa enag sifakaligba hwa bite nai sifkalim gwasim hilifenag enaba mo mas ihla ofgufi.

⁹Afa ne Sisasim olug onigig la kehla guba asa God nengelim lambgofufiba afa eba ne suialag afofufe.

¹⁰Afa Godna mo fli sihiafule el sihini og Godba nengelim esmunagim kwaganife. Afa enag el mogim yisigigim afa fahiginim ha mina bigim Godba pese lambife.

¹¹Afa autunam Kraisna Sungwabug ehengelim sefugohon finiba asa mo ehengelni mengig la enaig sihifeni og ilawanaba Krais eba susug flanam asa sumi mo ehe kwania unehlag nemug flafe. Afa ehengel sahni og, eba amban maia afa ahnana sa pugufe?

¹²Afa God ehengelim mo fli sihiafule elim ogfunig afa heafgelnii gafugag eba mango hefum mo eba nengelim sumi naim kwaganig. Afa ehengel ena mo sihinibi afa glau ne gwenaig mo higig. Afa God heafna Sungwabug heven la naim ningihiagba asa heafna wasneig yi el Godna suialag mo sihigbi afa ne gwenaig mo higig. Afa mangwal suialag God sa bigim esinigbi oflanai el ogna enam anwenafi.

Sa big afsug kabag el fi

¹³Masa nengelni onigig haig haig la ikaminefenfie sa ne Sisasna mo numweheg kehlagufiba asa ne nof feagegofim. Afa sa ne gunag onigig la afohiefiba asa ne nenge afofum eba maia Sisas Krais ombusug yi puguiba asa God nem esmunagim kwaganife.

¹⁴Afa sa ne Godim higina ofenaiba suialag luwal. Afa nimbeafna sawieg nengel nai yi go maia nem anwena gohug fwainig fenagba nofeka enam pataflu.

¹⁵Afa God nem awamonag eba ehe afsug kabag el feg. Afa nengelni nihe gafa sa ma gwenaig afsug kabag fe.

¹⁶Afa Godna ginof enaig esog;

Kaba afsug kabag feg asa ne gafa gwenaig afsug kabag fi.

Wkp 11:44,45

¹⁷Afa maia nengel Godim ahsahnifibi asa enaig seflififi Api. Afa God elni haigim fahigeagegim asa mungwali elim mungwa mina kwefihianugeg. Afa sa ne onigi hwa bite mango nimbeafgelnii mo

eba maia nenofkenagag gofibasa ne enaig onigife, masa kam God kwefihianagefe eba kana nihe sa mas suialafe mo.

¹⁸ Afa autunam ne nimbeafgelni simbianigana nihe mo la ne gofena afa enag nihe nem mas kwagana mo afa sa nem God enanai lambig. Afa ehe mango bitenai wagna silva afa golna ese mo amo enaig eba sumi yi amtakwalig saihefe.

¹⁹ Eba Kraisna taf fwina numwehe fukog enana God nem lambig. Afa Krais ofenaiba sipsip luwalig mangwal ehem feg fwainig asa Ju el sipsip tigi tuhlu Godim faig lofeg.

²⁰ Afa maia God bitem gafugafeg fwainig maisim fiahfenaba afa enanam Kraisim ati kanog fwahana. Afa hwag osuna eba sumi yi osuna asa Krais ambala ati pugugim nengelim kwaganig.

²¹ Afa ne Kraisna mo kehligim asa ne Godim olug oniginig. Afa God ehem biteg kife nai ilafatigim unehlag kwania faig. Asa ne Godna mo oniginigim afa ne nenge afofofe ehe heafna mo esebe nufuna pugufefe.

²² Afa ne nufuna mo higigim patalfugba asa ne afsug fig afa ne Kristen nilitem membegonug. Afa enag membug onigig sa ma nengelni olug yi gofi.

²³ Afa Godna mo eba nofkenagag mo gwese wahkig gofufe. Afa enag mo nem fuklag mulug nofkenagag faig afa ofenaiba alag mas lahai.

²⁴ Afa Godna mo enaig esog;

Mungwali el pos lofug eba mwakwalig afohie
afa ehengelni suialag gawig pos sisig lofug eba awaienfi.
Afa pos fofernam afa pos sisig bogohia apaiyefe,

²⁵ afa Ainiyagna moba gwese wahkig gofufe.

Ais 40:6-8

Enag mo eba Godna suialag mo el nem sihigonug.

Ainiyag eba nofkenagag sumul feg

2 ¹ Afa sa ne mungwali amtakwalig nihem masigim fati. Afa nofeka mwakwal mo sihi afa sambaga mengigna fi afa ambobugiagi fiahgi afa elim sehii.

² Afa luwal ninganai mas mangwalim onigi eba ehe tutim mungu membenag afa ne gafa sa ne Godna nufunam fanem membena. Afa enag fane nengelni sungwabugim kwaganiba sa ma wasneig fei asa ne ihlafenam sa ne God i suialag hawag ahfe.

³ Afa Godna mo enaig esog, “Ati ne nangug Ainiyagna nihe eba suiala feg.”

⁴ Afa Ainiyag eba sumul nofkenagag feg afa el ehem fahige flinim og eba amtakwalig. Afa God ehem fahige fiaflagim og, eba suialag asa ehem kanog fwahagba asa big ehem nangum afu.

⁵ Afa nengel gafa nofkenagag sumul fig afa Godna Sungwabugni wasneig yi ehe ogna nem esenibi asa ne Godna lala fife. Asa nengel afsug

pris fig afa Kraisna uehlag la sa ne suialag nihe Godim faig ofenaiba
pris sa Godim sis tuhfu faini.

⁶Afa Godna mo enaig esog og;

Sa higim, autunam ati ka suialag sumul kanog fwahana
eba mingnagim gosenig afa fwina suialag lala sumul feg eba ka
Saion kembig fakag.

Afa ambangel ehem olug oniginibi eba mas afwanfi. *Ais 28:16*

⁷Afa ambangel sa ne olug onigig enag sumul eba nengelim suialag nemug
fenig afa ambangel mingnag mas olug onigig mo enaba ming mo enaig
esog;

Afa lala nimblag el sumulim fahigenagigim og eba amtakwalig
sumul asa esugum fatig.

Afa sona sumul eba ehe gosegim afa fwina suialag lala sumul lofug
feg. *Sam 118:22*

⁸Afa ming Godna mo enaig esog;

Afa enag sumul eba kaksag elim mwelkel fetife gofib
asa el ena sumul mogug yi apaiyegofe. *Ais 8:14*

Eba ehe Godna mom fingi fatigbi nasa ehengelim mwelkel fetife go. Eba
autunam God ati anwenafe fwahana eba enaig esifi.

⁹Afa nengel eba God ati nem kanog fwatig afa God ehe misog el feg
afa nengel heafna pris fig afa ne afsug kabag el figim afa Godna el fig.
Afa ehe nengelim enaig esinigbi asa ne heafna suialag gafugagim ambala
sihiagi. Afa ehe nengelim awamonugbi asa ne sikulufeg la nai fwahinim
heafna suialag ombusug nemug gam ambegog.

¹⁰Ilawana ne mas Godna el fini mo afa glau ne heafna el fig. Afa
ilawana mas ne heafna aflafegim anwenafini mo afa glau ati ne flig.

Asa big misog elim ahnai skaufegon

¹¹Kana hihe, maia big hwa bite la auguiaba sa big onigigim hwa bite
eba mango bigelni mo. Asa hwa bite nai amtakwalig onigig elig ona
ese, asa nofeka enam patalfu. Asa enag onigig nengelni sungwabugim
ahuflago.

¹²Afa nengelni nihe awambanai elninof la sa ma suialag nemug
fei. Afa maia ehe nem mwakwal sehtigifibi asa mungwali el anwenafi
nengelni nihe eba suialag asa enag osuna God oblofibahengel ehena
uehlagim fingi fifi.

¹³Afa sa ne Ainiyagim onigigim asa haig haig bite nai misog elim
ahnai skaufegon. Afa sa ne gavmanna misog elim ahnai skaufegon eba
heafna mo sisi yi feg.

¹⁴Sa ne gavmanna gafugag elim gafa gwenaig esegon. Afa misog el
ehengelim ningitigiba asa amtakwalig elim susug faigogim afa suialag
elni uehlagim mo fingi fig.

¹⁵ Afa God enaig membeg og, ne suialag nihe esigbi asa enaba anwena fwainig elim afwanefug faig asa ehe mengig pwakafegim afa ehe mas amtakwalig mo sihi.

¹⁶ Afa God nem og, se eseafufum asa nofeka enaig onigigi ne og ati ka enaig mo flag eba ka amtakwalig esefe. Amo, sa ne Godna esug gafugag el afohie.

¹⁷ Afa sa ne mungwali elim suialafegon, afa Kristen nilitem fwina membegon, afa sa ne Godim bwata ningmanginim asa ahnai skaufini afa gavmanna misog elim suialafini.

Krais susug flag asa big gafa gwenaig esi

¹⁸ Afa ne esug gafugag el sa ne nimbeafgelnii misog elim ahnai skaufegon. Mangofi ehe aflafenig el me amo ehe wasneig el me. Sa ne ehem suialafini.

¹⁹ Afa atiaba ne Godim mungu oniginagba afa suialag gafugafe asa el munum nem susug faigbi afa ne esmunagim susug flag. Eba enanai yi God nem suialafenafe.

²⁰ Afa atiaba ne amtakwalig nihe esegba asa nem ena nagum tigifi eba ne esmunagim susug flag eba el nem og eheba suialag el ehe? Amo, el mas enaig esogoi. Afa ne suialag gafugafegba asa ne esmunagim susug flag eba God nem suialafenafe.

²¹ Afa Krais nengelim kwaganigim kinig flag asa God nem kanog fwtatigba asa ne gafa gwenaig esi. Afa Krais ehe mina ogfug asa ne gwenaig nihe fi.

²² Afa ehe mas mango weti fena mo afa ehe mas mwakwal mo sihina mo. *Ais 53:9*

²³ Afa el ehem amtakwalig mo fainibi afa ehe mas mungwag esoni mo. Afa maia ehe kinig flagba ehe mas mungwag ehengelim enaig esinigim mo sihini mo. Afa ehe og ka kikeafna onigig gwasim God nai yi fwahaiba asa God eba suialag kwefihiageg el feg.

²⁴ Afa maia el Kraisim li katigeg la akahlifnibi ehe heafna eligni bigelni amtakwalig mo flani. Afa ehe enaig esegba asa big amtakwalig nihe gwasim fwahinim asa suialag nihe la saiye afofum. Afa ehe susug flagba asa enanam bigim suialafe klaitig.

²⁵ Autunam ne sipsip lofug minam etetiageni afa glau ne sipsip nangwaghiawagig el nangum ambegba asa ehe nem nangwaghiawagego.

Alagag angwag nai yi mo

3 ¹ Afa nengel angwafig sa ne nimbeafna alagagim ahnai skaufegon. Afa ehe Godna mo higigim oksigba asa ma ehe nengelni nihem nangunim asa ma onigig waikefi. Afa enamba nengelni mo sihiagim goseg.

² Asa ehe nem nangwagi ne Godim ahnai skaufigim afa neana nihe suialafeg asa ehe gafa ona Godim patalfu.

³ Nofeka enaig onigwagi ka kikeafna eligim wagwagi afa lapogim kikeawagi afa engig aitiagibi ka sa suialag angwafig apuke.

⁴ Afa neana suialag wag sa ma olug yi gofi. Sa ne aflafeg nihe i afa nengnag augufeg nihe i aitiagi. Eba neana suialag wag mas amtakwale. Afa enaig nihem eba naho God fwina membeg.

⁵ Afa afsug angwafig autunai heafgelnii onigig God nai yi fwahini enaig esenibi asa suialag angwafig apukenam ehe heafgelnii alagag bugugum ahnai skaufegoni.

⁶ Afa Sara enaig angwafig feg. Ehe Abrahamna mo higinam patalkunam afa ehem og ne kana saglagluwal. Afa ne atiaba suialag nihe esigbi eba ne mas embebefi eba ati ne Sarana luwal fig.

⁷ Afa nengel saglag nembeafna angwafig i sa ne suialag hawag ahfe. Sa ne enaig onigifi angwafig mas wasneig mo asa ne bwata fegon. Afa God ehengelim gafa esmunagim kwaganig afa nufunamnofkenagag faife. Afa ne enaig esigbi eba mas mangwal nengelni betenim kagfoni.

Big suialag nihem esinim asa kinig fli

⁸ Afa kana mo muhla fwahagim ka ofe. Sa ne mungu onigigna augu i afa elim aflafegon afa nilitem membegoni afa elim suialafehiagi afa haig haig tonbusugim fwati.

⁹ Afa el nem amtakwal fiahflaiba nofeka mungwag gwnaig esena. Afa el nem agi mo faiba nofeka mungwag gwnaig esona. Amo, sa ne Godim sahnibi God sa ma ehem suialafehiage. Afa God nem awamonagim asa ehe nem enaig mo faife.

¹⁰ Afa Godna mo enaig esog;

Afa amban el membeg ogna suialag augufe afa heafgelnii nofkenagim sifakali.

Eba ehe sa ma amtakwalig mo mi afa mwakwal mo mi fwahi.

¹¹ Afa sa ehe amtakwalig nihem fwahinim afa suialag nihe la saiye afohiefi.

Afa sa ma ehe enaig onigifi ka sa mingnag el i mungwal onigig ahfe afa sa ehe ena minam fwina patalfui.

¹² Afa Ainiyag suialag elim nangwaghiawagego afa ehe ehengelni sahigim higinig.

Afa ehe amtakwalig elim masig fatinig.

Sam 34:12-16

¹³ Afa sa ne sifakalna suialag nihe fefe eba amban sa nem amtakwale fetife?

¹⁴ Afa ne suialag nihe esegba afa enanai yi ne susug flag sa ma God nem suialafiahflai. Nofeka ehengelim embefinim afa enam fwinam onigkafim.

¹⁵ Sa ne Kraisim nimbeafna onigig la flafatinam afa sa ne eso ehe kana Ainiyag feg. Afa nimbeafgeln olug onigigim ambala sihiagim numwehiagi afofum. Afa maia el nem sahinibi sa ne suialag sihife.

¹⁶ Afa sa ne ehengelim nengna mona wahigi sihigoni afa suialag fegoni. Afa Godna nof la sa ne suialag nihe fi. Afa maia el nem sehtigibi eba nem nangwagig maia ne Kraisna elni nihe figbi asa ehengeln mo ehem awfanfenig.

¹⁷ Afa God enaig esofe afa suialag nihe la ne kinig flifie eba suialafeg. Afa ne amtakwalig nihe la kinig flifie eba amtakwalig.

Krais lahagim pese buihag bigim God nangum lamblug

¹⁸ Afa Krais bigim lahanigim bigelni amtakwalig huguflaitinig afa bigim God nangum lamblug. Afa enag suialag el amtakwalig elim enaig esenig. Afa ehe mungunagim lahagim afa enag lahag gwenanai yi blo fegba asa amtakwalig huguflaitiag gafugagim tigeflakag. Afa ehe el feg asa ehem tigifatini afa God ehem ilafatigba afa ehe glau sungwabug feg.

¹⁹ Afa ehe enaig gohugum afa kalabus la nai sungwabugim ikag mo sihinig. Afa ehengel elni sungwabug.

²⁰ Afa enanam Noa sipim gafugag ofefenaba afa ehengel Godna mom higigim oksini. Afa God nenge gofena mas ikagna kwefihianugena mo asa ehengelni sungwabug ena sungwabugni kalabus yi saiye afuna. Afa enanam eba mingnag el sip yi saiyan afa bu wagi fakanaba asa God enag gug yi gohug elim mungu kwagana.

²¹ Afa ehengel bu sisi yi afohie fenaba afa God ehengelim pese lambina. Afa enaba bu la aitiagim ogfug afa glau ne bu la apaiyegba afa God nem pese lambig. Afa enaba mango nufwefim gigiafeg mo amo, eba ne Godim sihi fwahanag ka neana nof la afsug el afofufe. Afa God Sisas Kraisim bite kife nai ilafatig asa enana nem pese lambig.

²² Afa ehe heven gam ikagim afa Godna nihiginai ningagam ga asa mungwali oflanai el i afa wasneig sanel i afa haig haig wasneig gawig i ehem ahnai skaufinig.

Sa big autunai nihem masig fatini

4 ¹ Afa Krais heafna eligni susug flag asa ne gafa numwehiaginim gwenaig esi. Afa el heafna eligni susug flagba asa ehe mas haig amtakwalig nihem onigig mo.

² Asa ehe hwa bite la gohba asa mas bite nai onigig ehem kehla gufi afa ehe Godna sawiegim patalkug.

³ Afa nihe awambanai el sa membig autunam ne gwenaig fena. Afa ehengel sa enaig esini aga taitu i afa haig haig membug i afa moinainig i afa buyis la sifkalig i afa mwakwal godim oniginig. Afa enaig nihem patalfuiagba ati ne fwahig.

⁴Afa enag amtakwalig nihe ne masig fatig asa ne mas awfambanai el i wahe enaig esi. Afa ehengel sineminefigim asa nem amtakwalig mo sihigonig.

⁵Afa nengigim God elim kwefihia ofefiba asa ehengel heafgelni mungwali haig haig amtakwalig nihe ambala sihiagifi. Afa God ati numwehiagegnofkenagag el mi afa melig pigieg el mi kwefihiajegim fwahag.

⁶Asa ehe melig pigieg elim gafa suialag mo sihini. Eba nufunam ehengel ati pigi asa gwenaig mungwali el haig haig fiahgig eba pigife. Afa ehengelni sungwabug eba wahkig gofufe ofenaiba God ehe go.

Sa big gawig God bigim faig suialafe fli

⁷Afa mungwali gawig ati awaiegim muhla ofe. Afa sa ne onigiwaginim afa numwehiagifim asa ne beteni.

⁸Afa sa ne mingnagim fwina membegen. Sonaig nihe eba nahomingnag nihem gosenig. Afa ne elim membenigbi enag eba kaksag amtakwalig nihem fwatigim asa ne mas mungwag esini.

⁹Afa sa ne Godna elim nimbeafna lala gam wanikiafim afa nofeka enam lagni.

¹⁰Afa God nem haig haig wasneig mungwali nem mimageni. Sa ne enag numwehe suialafinim afa enag wasneig God nem faig asa Godna mingnag elim kwaganim.

¹¹Afa amban Godna mo sihiag el feg sa ne mo sihig ena mo God heafna mo lofeg. Afa amban kwefwag el safeg asa Godna wasneig yi enaig ese. Asa el nengelni mungwali gafugagim nangwaginim afa Sisas Kraisna unehlag la Godim fingi fifi. Afa kwania unehlag i afa kwania wasneig i eba heafna feg afa enaba wahkig gofufe. Enaba nufunam.

Afa bigel Krais lofug kinig fligbi asa big sifakali

¹²Afa kana hihe, maia enag kinig nem yuhnidgi nofeka sineminefi eba mango mulug mo.

¹³Krais kinig ati kahlagba asa ne gafa gwenaig esinim asa enam sifakalini. Afa nengigim heafna kwania unehlag ambala puguiba asa ne fwina sifakalife.

¹⁴Afa ne Kraisna el fig ma nem el amtakwalig mo sihigonibi sa ne sifakali. Afa enaba enaig ogfug feg Godna Sungwabug nengel nai yi go. Afa enag Sungwabugbi eba kwania unehlag nai yi wasneig nai yi feg.

¹⁵Nofeka ne elim tigifati, afa gawig ukwefi, afa haig haig mingnag nihe fi, afa nofeka pwetigeflag el lofi. Masa ne enanai yi kinig flafe.

¹⁶Afa ne Kraisim patalfugba asa enanai yi kinig ne flig eba nofeka enam awfanfi. Sa ne Godim suialag oni eba ati ne Kraisna unehlag na fig.

¹⁷Afa Godna kwefihiajagig osuna muhla ofe afa sa ehe heafna elim enanam gof gam esenifi. Afa ehe bigim gof gam esofenifife eba sumi yi

gafa el ehena suialag mom masig fatig ehe ehengelim fwina amtakwalig esenifi.

¹⁸Afa Godna mo enaig esog;

Afa atiaba suialag el Godna mina gam kinig flagba asa God ehem suliaflag afa sa haig amtakwalig elimbi pugunifie? *Snd 11:31*

¹⁹Afa atiaba Godna sawieg la mingnag el kinig fligbi asa ehengel suialag nihe esibi asa enaba ogfug hefum Godna ninga la fwahig. Afa God elim esenaiba asa heafna mo sihi fwahagim suialafiahflafe.

Siosna misog elni mo

5 ¹Afa koka nem siosna misog elim mo sihinuge. Ka gafa siosna misog el feg. Afa maia Krais susug flagba asa kikeafnanofna ka nangug. Afa maia Kraisna kwania unehlag ambala puguiba asa ka gafa suialag heafna flafe. Nasa ka nem enaig sihifenig.

²Afa sa ne Godna sipsipim numwehe nangwaghiagi asa ehe ehengelim nengelni ninga la fwatig. Afa enag gafugagba nimbeafna membug la sa ne esi afa God enaig onigig membeg masa el nem hekusihagifi. Nofeka kig flag onigigna gafugafi amo sa ne Godna elim oniginim asa gafugafi. Ehengel eba sipsip lofug.

³Afa nofeka misog el lofinim afa Godna elim mo piga lambpaigo. Nofeka enaig esi. God ehengelim nengelni ninga la fwatiba asa ne suialag mina ogfuginibi sa ma enag sipsip ena mina patalfui.

⁴Afa maia sipsipni nangwaghiawagig elni misog el ambala puguiba asa ne suialag nemug wag flifi ena wag mas amtakwale.

⁵Afa nengel kwablog el sa ne gafa misog elim ahnai skaufegon. Afa ne mungwali nimbefum ahnai skaufeaginim. Afa Godna mo enaig esog;

God tonbusug elim pigalau pifi. Afa el sa hefum sugupeg eba God ehem suialafenife. *Snd 3:34*

⁶Asa ne Godna wasneigim ahnai skaufini afa osuna sa ehe eso fwahag, enanam ehe nem fingi fefe.

⁷Afa God nem fwina aflafenig asa nimbeafgelni kinig heafna ninga la fwahi.

⁸Sa ne numwehiaginim afa nof fiahgifibi. Afa Satan nengelni angoluwig eba ofenaiba laion^a euaka ona elim tige ne.

⁹Afa ne anwenafig mungwali hwa bite la nengelni kristen nilite gwenaig kinig flig asa nengelni olug onigig wasneig gofibafa Satanim fingi fati.

¹⁰Afa ne Sisas Kraism olug oniginibi asa ilawana God nem aflafenigim awamona sa ne heafna suialag gawig la wahkig hawag fife. Afa kinig sa ne flag eba mwakwalig gofe afa sumi yi God ehe nem pese suiala fiahflanam asa nem wasneig na geba asa ne wasneig gofufe.

^a 5:8 Laion eba wasneig sis sangwalinai pusi lofug.

¹¹ Na Godna uehlagim fingi fi asa ehe kwania wasneigni wahkig gofufe. Eba nufunam feg.

Pitana sumi yi mo

¹² Afa hwa weti ginofba Sailas kam kwegfug ginofeg. Afa ka anwenafeg ehe bigelni suialag nilite. Kog ka nem wasneinuge na ka enaig esog hwa ginof eba Godna suialag kwefwag offug. Sa ne hwa mo kehlanam wasneig gofum.

¹³ Afa Babilon la nai sios el nengelim enaig esogog ka mas nem etetigoni. Afa God ehengelim gafa kanog fwatig. Afa Mak ofenaiba kana luwal ehe nem gwenaig esonig.

¹⁴ Afa mingnagim nilitem sa ne kikigehiagi enaba offug ne kristen nilitem fwina membegonig. Ne mungwali Kraisna el fi sa ma nem olug enesieg gohoni.